



Köbi da Winterthur (dretg) ha runà ses collega - atgnamain in fan da Bayern München - a Bad Ragaz. Già dapi che Chapuisat ha jugà a Dortmund è Köbi en febra per la squadra tudestga.

«Marco! Marco! Guarda qua! Guarda qua!»

La simpatia dals fans tutga a Reus – malgrà ils jugadurs svizzers

DA CLAUDIA CADRUVI / ANR

■ **Ushè gronda è la schanza darar da vesair in star da ballape sin mo paucs meters distanza. E tgisà, forsà survegn'ins perfin in autogram sin la nova balla u sin il t-shirt? U forsà pon ins perfin far in selfie? Also, giainsa a Bad Ragaz!** Quai han pensà in'entira rotscha da fans ch'èn stads a guardar ier l'ultim da sis trenaments publics dal BVB a Bad Ragaz. Già en il shuttlebus sentan ins la tensiun. Dus fragliuns vestgids total en mellen dumbran si tgi ch'els lessan vesair: *Marco Reus, Mario Götze, Manuel Akanji e Roman Bürki*. «Forsà pudainsa gea era trenar cun els?» di la sora che porta in gross gep vi dal baratsch dretg. «Ti lesses trenar cun tes gep?» dumonda il frar. «Nagin problem», di la sora.

Schonglar per 30 milliuns

Avant la piazza da trenament stattan giuven e vegl spalier. Ils persunal ha tutta bregia da far star davos ils giatters ils fans. Ins spetga ch'ìls jugadurs arrivian cun velo. Tutenina schula in suenter l'auter sperasora. Ils aspectaturs èn in pau trumpads ch'ìls jugadurs enconuscents n'èn anc betg arrivads. Lura vegn il bus. «Sa sche quai è il bus che quest sturnichel aveva fatg in attentat l'onn passà?» dumonda insatgi. Nodas u fastizis n'èn betg da vesair en il lac nair, be l'inscripziun

«wahre Liebe» paradescha sper il logo mellen BVB.

Già diesch minutas avant ch'il trenament cumenza è la tribuna d'aspectaturs plaina. Ils fans guardan spannegiads sin la piazza verda, schegea ch'i va anc in urella. Nagin sa lamenta pervi da la chalira. Lura vegnani. «È'l qua?» «Gea?» «Nua?» «Guarda là, il terz! Vesas?» Ils blers tschertgan l'emprim Mario u Marco. Ils jugadurs svizzers Manuel Akanji u il goalie Roman Bürki tutgan para tar la segunda garnitura.

Ils jugadurs tippleschan avant la tribuna vi ed enturn l'entir plaz. Igl è pulit nunspectacular. Ils jugadurs cumenzan a circular la baratscha. «Guarda guarda!» di in fan agità. Cura ch'ìls passa ventg ballapedists dribleschan enturn las pitgas daventi in zichelin pli interessant. Lura cumenza l'acrobatica cun la balla. «Guarda il Weigel schonglescha per 30 milliuns?» di in mat. «10 milliuns bastassan era», manegia ses collega.

Suenter trenescha la squadra cumbinaziuns – plitost cun pauc anim, i fa gea chaliras – ed il davos dat ins in gie – cun in zichel dapli anim, malgrà la chalira. Ils fans spetgan atgnamain mo sin ina chausa: autograms.

Duas giadas pelegrinà a Bad Ragaz

Ils fans na vegnan betg mo dal conturn, mabain èn per part stads uras sin viadi. *Cheyenne* è aposta vegnida da Spiez e res-

ta per dus dis per vasair dus trenaments e per pudair tiers dus autograms. La dumengia ha ella survegni in da *Lukasz Piszczek*, uss less ella anc exnum in da *Marcel Schmelzer*.

Köbi cun il schnuz grisch admira dapi hahajas ils Borussians. Già l'emna passada è Köbi stà a guardar in trenament. Uss è el vegni in'ulteriura giada cun ses ami ch'è fan da Bayern München. L'ami sto tadlar enqual beffa da Köbi, ma per la fotografia fa el fatscha da rir.

Da l'Entlebuch vegn *Ines* cun ses dus figls *Felix e Frederik*. Omadus datta sa chapescha sez ballape e vulan exnum autograms. Era els èn già stads l'emna passada a Bad Ragaz. Ma lezza giada avevi daratgà talmain che l'autogram è crudà en l'aua. Forsa han els uss dapli fortuna.

Blers autograms ed i na basta tuttina betg

E lura èsi uschè lunsch. Il trenament è a fin ed ils fans sa stauschan e sa fultschan enavant. Ils stars vegnan ed ina mar da mauns e handy sa stenda sur las bandas. Ils jugadurs fan il pussaivel da dar tantas sottascrizziuns sco pussaivel. Gnanc ina secunda dovran els per signar in shirt u ina balla. Tgi che ha cletg vegn anc da far in selfie. Suenter paucas mintuas èsi già vargà. Tgi che n'ha nagin autogram sto spetgar fin l'onn proxim e sperar ch'ìls Borussians turnian puspè a Bad Ragaz.



Frederik, Ines e Felix da l'Entlebuch guardan quest onn già il segund trenament. L'emprima giada avevi daratgà ed i n'ha dà nagins autograms. Lura vegn ins pia anc ina giada!




Cu vegnani?

FOTOS C. CADRUVI



Resch nov ed aposta cumprà per laschar scriver si autograms.



Cheyenne ha fatg aposta il viadi da Spiez per vesair ses jugadurs preferids Lukasz Piszczek (da lez ha ella già in autogram) e Marcel Schmelzer (da lez dovra ella anc in).



Marco Reus e Julian Weigl fan il pussaivel per cuntentar ils fans. Tuttina turnan il davos mo paucs cun in autogram a chasa.



Lian è già la terza giada cun il bab Tino a Bad Ragaz. Els vegnan da la Turgovia. Il 1996 sco mat ha Tino survegni ses emprim tricot mellen. Dapi lura è el stà fidaivel als Borussians.